

M224: Summa Theologiae

- 0,1 Got vater ewich ist daz angengi .
0,2 allir guoten dingin .
0,3 der gibundin hat den diuuil .
0,4 des mancrafft wonit ubiral .
0,5 su ist obini . duv dinc richtinti .
0,6 undin uf habinti .
0,7 innin is su si iruullinti .
0,8 uzzin umbi uahinti .
0,9 dar an ist unuirwandilheit .
0,10 an unmuzzi un- ani arbeit .
0,11 Ain gotis craspht in drin ginendinin .
0,12 daz ist ouch gilazzin den selin .
0,13 disi habint insamint un- gischeidin .
0,14 rat gihugidi mid dim willin .
0,15 disi dri ginennidi
0,16 sint immir insamint woninti .
0,17 di ginadi uns got do uirliz .
0,18 do er unsich sin adim in blis .
0,19 dannin birin wir an der seli .
0,20 mid giloubin daz erliche gotis bilidi .
0,21 Got uori bimeinti in disi zuei dingin
0,22 al sin lob uuri bringin .
0,23 daz er si giwaltic un- guot .
0,24 uon den zuein er alluv wndir dud .
0,25 er ist kunic keysir aluvaltich .
0,26 un- uatir woliwillic .
0,27 zi duv daz wir hinnin .
0,28 beidi uorchtin unde minnin .
0,29 daz wir ouch uon disin dingin .
0,30 immir mugin sagin un- singin .
0,31 Got alwaltig wolti irovgin .
0,32 sini crefti uili dougin .
0,33 der sin wisheit was dir rat .
0,34 mid dem er elluv dinc giworcht hat .
0,35 er was meistir un- wercman .
0,36 sin gizuch was uil lussam .
0,37 er hiz werdin uvirin eingili .
0,38 geisti heri ioch uil edili .

0,39 woli giza- den edilin .
0,40 daz si alli uri werin .
0,41 daz si merri wnni habitin .
0,42 ob si n urilichin lobitin .
0,43 Der eingil allirherist undir den .
0,44 lucifer giheizzin .
0,45 der was als ein insigili .
0,46 nach demo uorni bilidi .
0,47 sini herschaf gigebin ime durch guot .
0,48 di kerit er alli in ubirmut .
0,49 er chot wolti sizzin nordin .
0,50 sin ebinsezzi des hohistin .
0,51 durh daz was er uirstozzin .
0,52 mit den uolginti imo ginozzin .
0,53 Do wart des nidis uatir lucifer
0,54 ein eingil abitrunniger
0,55 uoni der hohi giuil er so nidiri
0,56 daz er nimmir ni mag kumin widiri .
0,57 wand er uirlorin hat den willin
0,58 z allin gutin dingin .
0,59 do di gutin engili al .
0,60 an sahin den sinin ual .
0,61 z iri herrin si sich gihabitin .
0,62 uorchliche s in lobitin .
0,63 durch daz wart in gigebin .
0,64 daz s imir sulin insamint goti lebin .
0,65 Der selbo der dir wisi un- almechtig ist
0,66 samfti iruult er disin gibrist .
0,67 er gischuf zi der selbin heimi .
0,68 ada- uzzir demo leimin .
0,69 da was er arzit der wisi
0,70 daz wir bistuntin in paradysi .
0,71 wanti ienir noz zi in der ubili .
0,72 di sini herin edili
0,73 got irwac do dir ebinduri .
0,74 di unsir brodi erdi widir dem uuri .
0,75 Aal des dir mennischi bidorfti .
0,76 in uimf dagin got uori worchti .
0,77 an demo sechstin dagi worcht er in .
0,78 dis werilt al irwart durch in .
0,79 er habiti in allin gischephidon .
0,80 wnni odir bilihi odir herzindum
0,81 unsir chunftic ellendi .
0,82 was er mit disin allin drostinti .
0,83 daz si unsich des irmanitin .
0,84 daz wir heim zi der mendin hugitin .
0,85 Uon unsir herrin gischepphidi
0,86 gab er uns misilichi crefti

- 0,87 e mid demo steini .
0,88 gab er uns gimanidi herti der beini .
0,89 mid poumi grunni .
0,90 der negili chimin .
0,91 mit demo grasi den uachsi
0,92 daz iz selbi wachsi
0,93 di sinni mit den uligintin
0,94 suimmintin un- cresintin .
0,95 mit der eingili bidrachti .
0,96 di guoti uon den ubulin schidinti .
0,97 Uon den anigengin uirin
0,98 got wolti den mennischin zirin .
0,99 er gam mi uon den uuri .
0,100 gisuni uili duri .
0,101 uon den hohirin luftin
0,102 daz er mag gihorin .
0,103 uon den nidirin daz er gistinckin mag .
0,104 uon dem wazziri gismag .
0,105 der hendi unde der uuzzi biruridi .
0,106 gilizz er imo uon der erdi .
0,107 er gischuf in uffriecht daz er uf sehi
0,108 da midi si wir gischeidin uon den uehi .
0,109 Do wart zistunt mit dem eristin man .
0,110 suslich gidingi gitan .
0,111 daz er ein einwig rungi .
0,112 mid demo giboti uur mankunni .
0,113 ob er den sigi irwrbi .
0,114 daz der mennischi nimmir irsturbi .
0,115 wanti der unsir chempho do giweich .
0,116 leidir er unsich alli bisuech .
0,117 Der engili minni un- gotis huldi .
0,118 uirluri wir durch disi sculdi .
0,119 der thuuil wart ubir unsich giwaltig .
0,120 wir warin szuschilis dodis schuldig .
0,121 sith chom zi den suni unde zi dem giwegidi .
0,122 sun gotis barn der magidi .
0,123 er nam uon uns di doticheit .
0,124 un- gab uns di gotheit .
0,125 want er dir inzuischin woldi wesin .
0,126 uon des dodi wir alli sulin genesin .
0,127 Do der eingil durh sin ubirmuot giuil
0,128 ubir den gotis andin wart er weibil .
0,129 adam zi dem giwalti gihorti .
0,130 gnadi gotis sith daz zistorti .
0,131 der magidi sun wolti sinin ginannin .
0,132 uoni des uiantis giwalti giwinnin .
0,133 ani imo zi uil biginit er do muos er widir gebin .
0,134 daz er e uon schuldin mohti habin .

0,135 Adam der andir . wolte sinin ginannin .
0,136 uon rehti widir giwinnin .
0,137 er was uon sundin reini .
0,138 er drat di torculin altirseini .
0,139 do ahti der uiant di meinnischeit .
0,140 da dir middi was uirborgin duv gotheit
0,141 daz chordir urumit er irhangin .
0,142 mid dem angili wart er giwangin .
0,143 crist gab sini unschuldi uir unsir schuldi .
0,144 tiuri chouf er unsich widir zi der huldi .
0,145 Got wolte daz cruci in uir spaltin .
0,146 disi werilt alli gihaltin .
0,147 do wart er unschuldig irhangin .
0,148 er habiti uir enti dirri werilti biuangenin .
0,149 daz er sini irwelitin alli zi imo zugi .
0,150 suenn er den uiant bitrugi .
0,151 durch des ellentin scalchis not .
0,152 leit der gotis sun honlichin dodh .
0,153 des dodis craft do irstarbti .
0,154 mit demo lib er sini holdin widir giarbti .
0,155 Adam inslif sin siti wart ingunnin .
0,156 euim wart dannin bigunnin .
0,157 beinis uesti wib uon dem man giwan .
0,158 mit uleischis brodi war der wechsil gitan .
0,159 inuart ouch in sitin duv archa was .
0,160 in der manchunni ginas .
0,161 unsir heil was . uru bidacht .
0,162 crist in eruci ioch in douffi hat si bracht .
0,163 uon des wndin wir birin giheilot .
0,164 der uns zi uesti mit brodi wart uirdeilot .
0,165 Druv des heiligin crucis ort .
0,166 sint des giloubin druv wort
0,167 dar undin ist daz virdi .
0,168 der drun ein gimeinlu redi .
0,169 der urunti minnin undi der uianti .
0,170 breitoti di uirdenitin hendi
0,171 an den sol ufrecht irstan .
0,172 suer mid goti wil uolhertin .
0,173 zi himili gidingi ob houbit ist .
0,174 daz inthebit al din dougini gnadi crist .
0,175 Suer so wolli cristis wegi uolgi .
0,176 der dragi sus sinin galgin
0,177 an dem er allin sinin willin .
0,178 uon ubilin werchin mugi gistillin .
0,179 sin selbes werdin ungiwaltig .
0,180 goti gihorsam un- ehaltig .
0,181 wil er dan also uolsten .
0,182 ani rum durch den gotis willin .

0,183 so hat er den geistlichen gibilidot .
0,184 der unschuldig durch in wart gicrucigot .
0,185 Dev gotis minni ist ein kunigin .
0,186 undir allin dugintin .
0,187 du sulin leitin uorchti un- zuuirsicht
0,188 uuri di gotis selbis anisicht .
0,189 uorchti uoni helli dinit in scalkis wis .
0,190 gidingi des erbis in sunis wis
0,191 suenni si di ninni uolbringint .
0,192 unzi si got irkennunt .
0,193 ani uorchti bistet dar inni
0,194 mid dem uat- in sunis wis dev minni .
0,195 Got der dev minni ist hat uns offin gitan .
0,196 wi wir di minni sulin han .
0,197 er gischuf an uns duv gilit alli .
0,198 einandir dininti .
0,199 duv gilit duv dir sint ani di eri .
0,200 der bidursi wir meri .
0,201 nu ni mugin di ougin uirwizzi
0,202 di nidiri den nuzzin .
0,203 alsus biri wir undir uns gilegin .
0,204 wi wir brudirlichen sulin insamint lebin .
0,205 Wanti got al mag un- al guot wil .
0,206 uon dan wart der dingi so uili
0,207 sui si unsich dunkin mislich .
0,208 zi demo gotis lobi sint s alli gilich .
0,209 ist zuiwir libi middilanc .
0,210 obini gnadi unolini giduanc .
0,211 drowit uns zi der helli elluv duv giscaft .
0,212 duv dir ist scarf un- darihaft .
0,213 suaz dir ist sempfti undi wnniclich .
0,214 daz dinot al deme gidingi in daz himelrich .
0,215 Der uiant an den gotis uiantin
0,216 richit den gotis antin .
0,217 sinis undankis dinot er .
0,218 gotis holdin . mit uorchtin machit er .
0,219 er in mag nimannin biuellin .
0,220 war mid sin selbis willin .
0,221 unsir erdi ist er nach schibinti .
0,222 di gnadi gotis uf zihinti .
0,223 also muoz er goti dinon .
0,224 imo sellin zi wizzi merit er unsir lon .
0,225 Nach unsir uordirin ualli .
0,226 uiruluchit wart duv erdi i midalli .
0,227 daz wazzir habiti got un ruchi .
0,228 er gischid iz uon dem uluchi .
0,229 unsich wolt er uoni den meinin .
0,230 an dir douffi gireinin .

0,231 di erdi giwsc duv sinuolut .
0,232 di undi giwihiti der heilant un- sin bluot .
0,233 daz gimischit uon sinir sitin ran .
0,234 mit dem er unsich irlosti un- heim giwan .
0,235 Crist unsir gisil dur unsich in grabi lag .
0,236 zuov nacht un- einin dag .
0,237 sinis einin dodis dag do ubivaht
0,238 unsirs zwiscilin dodis nacht .
0,239 in des eri man dri stunt bisouffit
0,240 den man rehti gidouffit
0,241 da sulin wir werdin
0,242 sin ebinbilidi uf erdin
0,243 iv der uordirin ingultin wir .
0,244 der uursprechintin giloubin ginizzin wir .
0,245 Houbit ist irstantin der cristinheit .
0,246 des duv gilit alli habint undirscheid .
0,247 er ni wil uurdir nicht irsterbin .
0,248 uoni duv so ni mag zuischiligu douffi werdin .
0,249 der duv gnad ist der hat auir bigunnin
0,250 unsirmo herzin einis brunnin .
0,251 der mag unsich alli gireinin .
0,252 ob wir di sundi luttirlichei weinin .
0,253 der dir lonit sin selbis gebi .
0,254 der wil igilich sin gilit bringin daz iz inein lebi .
0,255 Got selbi lerti unsich chuschi un- dimuot .
0,256 gidult un- wesin widir ubili guot
0,257 un- uremidiz leit irbarmin .
0,258 lerin di du-bin helfin den armen .
0,259 di warheit bischirmin ungerne suerigin
0,260 uirmiden duv lastir ioch werigin .
0,261 uestin giloubin habi ioch gidingi .
0,262 zi der cristinlichin minini .
0,263 gotis wort gihorin als iz imo gizemi .
0,264 so wir in bitin daz cuch er unsich uirnemi .
0,265 Sui wir givallin so sol iz unsich ruwin .
0,266 undi suli wir goti uili wol gitruwin .
0,267 der dauidin dedthi lobisam
0,268 sit er uria- uirrith dem er sini chonin nam .
0,269 der demo scacheri sini meindat uirliz
0,270 un- imo daz himilrichi gihiz .
0,271 so lang och der gotis dri istunt uirlouginoti
0,272 ist nu di himilsluzzili draginti .
0,273 uzzir der aschin irlutiriti er unsich also daz glas .
0,274 des gnadi was daz paulus un- maria ginas .
0,275 Gotis bruth duv seli adilurowi .
0,276 uorchti du der iri duwi .
0,277 der lichami ist der seli chamerwib .
0,278 er mag iri uirlisin den ewigin lib .

- 0,279 duv seli sol iri selbir rati .
0,280 alliz guot der duw gibiti .
0,281 su sol irsterbi der duwi kint .
0,282 daz des lichamin ubiluv werch sint .
0,283 un- sol ediluv kint giwinnin .
0,284 zdi su zi demo gotis erdi mugi bringin .
0,285 Der dir ist beiduv got un- mennischi .
0,286 der gibit urstendi zuischiligi .
0,287 di seli let er uon den sundin irstan .
0,288 ioh uil lutirlich ruwi han .
0,289 uoni grabi irstent noh luiti uir slachti .
0,290 an der iungistin wachti
0,291 zi der urtheli ni chumint di wirsistin
0,292 di dir sint uor uirdeiliti .
0,293 di durchnachtigin sulin irdeilin .
0,294 di dir sint der zeuir meddimin .
0,295 Duv gotis urthel ist hi dougin
0,296 zi demo suontagi ist su offin .
0,297 manigin uillit got mit seri .
0,298 daz er sich zi demo guti keru .
0,299 ob er sich dan bezzirini ni welli .
0,300 daz er in uor geriwi zi der helli .
0,301 zi ivngist in offinimo zorni .
0,302 di heliwin scheidit er uon demo chorni .
0,303 da sihit ein igilichir nach sen selbis wizimcheit .
0,304 an demo gotis suni imo selbimo lib . odir leit .
0,305 Saligin di zi der zesiwin sint
0,306 immir gotis kint .
0,307 den uat- erit da zi himili der sun .
0,308 mid den er hat hi in erdi giwnnun .
0,309 insamint in drinchit er den win .
0,310 zeichin der ewigin mendin .
0,311 mid din engilin sint si undotlich .
0,312 mid in erbint si da daz himilrich .
0,313 got ist ir lib rawa unde minni .
0,314 also daz licht ist der ougin wnni .
0,315 Herro di dir dinint ist daz richi .
0,316 wi muogin wir dir giloni .
0,317 du dir nidir ginigi uf zi heuini den man .
0,318 der uo- sundin was giuallin .
0,319 du dir wesin woltis unsir ginoz
0,320 dragint unsir burdin so groz .
0,321 nu has tu herro diniu milten rat .
0,322 allin dinin holdin zi urowidi bracht
0,323 daz dih unsir irloseri alliz daz lobi .
0,324 suaz dir ist undir deme himili ioch dar obi .